

Leetal ya ésupiyenu ya eepoñee ya pakati Tesalonik 2 Tesalonik Waah wa weeyem wa ti leetal eyye

Aluu pakanam ti káyinan keeyemaam ka ti káasiitan, inci neekicanaa.

Añe leetal ya ésupiyenu ya eepoñee ya pakati Tesalonik. Ayme akiice yo? Oonooluu eekiice ya éyaañ ya: Póol.

Teyme naakiice leetal eyye? Ta naakiice yo ta, pikee pa láañoolut niñ ta éyaañ ya neekiicee ta. Póol náasi nii, páciite púsupak pitaakaataako ti pututa kéeyinane ka pakati Tesalonik:

1. Pakakee ti kéeyinane ka, kácookaacock káyinan nii, hinoom ha hiti Ateeteyo híkeyyookey, Yéesu apayaapa náañohoonii. Kincaam enkuu nkiseeñii nkiyokanii meemak. Tempo Póol naakiice ápiyisan nii, hinoom ha hiti Ateeteyo étihikey taamanta akee áyiin aña nkasok amuuyena ya ákeyyoot, hícump pakan nkasiijo kápitaakoolan Pútuun pa (2:1-12).

2. Kéeyinane ka payenka ammeya ka nii, kapookaapook páhin, kataakut haaci fo kanakan ñutumii ti pakakee. Tempo Póol náayisanii nii, kanapan elon ya eteyoo nkasincan fa naalone fa neyii, naasokii kacok kápihin páhin, naasokii lombo, timpi káwusen ti íhinu heenape (3:6-15).

Alaapalaka ti káasiitan ka kitaaluu. Alímaati Pútuun pa púwiiniyan saan unaa mpípankin

kunuu unaa kati úyiniyaa kasayan hilim etempo ti caacaw Añii etempo Yéesu Krista. Amíini.

Kakican ka

^I Inci Póol, Silas, nin Timote, ukicanaa aluu. Inci oopa ti hikiicu aluu, éyeniin ya eti kéeyinane ka pakati saatee ya eti Tesalonik, aluu keeyem ka ti Pútuun pa Paapaa ati unaa, nin Ateeteyo Yéesu Krista.

^{II} Alímaati Pútuun pa Paapaa ati unaa nin Ateeteyo Yéesu Krista kasampan aluu nkawufan aluu kásuumaay.

Kíiti ya eti éñhoonii ya eti Yéesu

^{III} Pakanam ti káyinan, unii tan óo tan unka ti hisoku Pútuun pa apalaka kamma aluu, apan fo nuuñañe íhinu, kaatuko káyinan ka kiti aluu kutowaatowo ti hiyanku pihan toko, te pálafi empa aluu púlooj ínnilafooliye pa mpíyemi ti epenano meemak.

^{IV} Ekina ewune, unii nuumaayoolo kiti aluu hátikin keeyem ka ti picanku pa piti Pútuun pa, kamma innicoke kíp ti káyinan ka kitaaluu, háati fa innicuke fa kúnuul kenfakat innikallanee.

^V Eehe púlooj híyisanaayisan nii kíiti ya eti Pútuun pa eecoonoole. Ekina ewune efinicokee pakan kéetuuniye pinako cáwii ca citi Pútuun pa, ceewune ca inniyemi ti kúnuul.

^{VI} Pútuun pa peecoonoole, efipikallan keekallane ka aluu,

^{VII} mpiyihan aluu keekallanee ka, nin unii lombo. Eehe efihitaako ta Ateeteyo Yéesu

áfaayisanees ta ápufulii alacana ti seemak sen-fakat nin̄ pumaleekoo pa piteyoo peetaake pa sempe.

^{VIII} Afaasiinan ti pisiya kéemiit ka Pútuun pa, kéetuulut ka ekoon̄an ya éesuume ya eti Ateeteyo Yéesu ati unaa.

^{IX} Efikasiinanees ti pisiya ti épucaloolo eti cancowiyaaw, nkálaañool nin̄ Ateeteyo nin̄ la ecaañ ya eti sempe sa siteyoo senfakat sa neeyem la,

^X ti hinoom eeha áfaakey ha. Ti hinoom eehuu, áfaakey kati ámakiyanees ti pututa pakanoo keesampanees ka, kéeyinane ka púloon̄ nkañaño ti hamake ha hiteyoo. Aluu lombo efiniyeno toko, kamma inniyinane eeha nuusoke ha aluu kiteyoo.

^{XI} Ekina ewune nunuuluum kiti aluu tan óo tan. Nuuluum Pútuun pa piti unaa kati píhin aluu pakan kéetuuniye, eloñ ya eti aluu neeyeno samat nii fa mpílafiye fa aluu nipiyeno ta mpiyonkale ta aluu. Alímaati piyankanan aluu tan óo tan nin̄ sempe etempo ancuk kati níyini íhinu heenape eeha innilafiye ha íhinu, nin̄ páhin empa inniyem pa ti íhinu kamma inniyinane po.

^{XII} Uluumaalum eehe ancuk caacaw ca citi Ateeteyo Yéesu ati unaa címakiyanees kamma aluu, aluu lombo innimakiyanees kamma akina. Eehuu efihitaako kamma kaasampan ka kiti Pútuun pa piti unaa nin̄ Ateeteyo Yéesu Krista.

II

Amuuyena ya

I Fiye pakanam ti káyinan, ínkeyyoo ti éñohoonii ya eti Ateeteyo ati unaa Yéesu Krista nin fa efuuconcoolanee fa upiyeniyaa neyoo, upuluu aluu,

II timpi niliimanoolo kamma payenka nkasok ka nii hinoom ha hiti Ateeteyo hícoliyoolol. Timpi níyinanii háati nkasok aluu nii kunuu ka kiti Pútuun pa kíyisanii ho, nin fotom nkási ho ti ekoonan nin fotom nkakalan ho pucuk fiye nii leetal éefulii peti unii.

III Timpi nikat an apicaakool aluu háati poonool. Kaatuko oom hinoom étihikey taamanta káataakoolan ka kenfakat ka kitaakiit, ekina eyem caanak enca hícump pakan efikasiijo kápitaakoolan Pútuun pa. Ti oom caanak, áyiin a amuuyena ya áfaayisanee lombo, anja ammeya ya nii ti pítin pa piti épucaloolo naayem.

IV Afaapook waah oo waah weesokee Pútuun nin kaaciin oo kaaciin, náaseepin fanoo tewwo. Afaayeno look ti ekumpan ya enfakat ya eti Pútuun pa naasok nii akina Pútuun pa fan etempo.

V Fo nínawuniit nii, ta inci iyyeniye ta nin aluu insoksok aluu enke?

VI Fiye nímeyimeyi heecokoo puson, hikina hiwune átayini ékey fo nin caanak ca citeyoo cicolaa.

VII Sempe sa siti kaamuuyen ka seeyolee sa unsa ti páhin, pale eecoke so ya puson afaatowo ti ihinu ho fo ta áfaafulanee, amuuyena ya naataak pítin.

VIII Tempo amuuyena ya áfaayisanee, pale nin Ateeteyo Yéesu ákeyyoo áfaapucalooloo nin es-

uunut ya eteyoo naamukoo niŋ ecaan̄ ya enfakat ya eti ékey ya eteyoo.

IX Amuuyena ya, ti ékey ya eteyoo, áfaakey niŋ sempe sa siti Seetaani ya, náhin waah wenfakat, hícump píyisan niŋ weecukantee uti kincaakool pakan paka.

X Afáahin heenaput óo heenaput kati acaakool keeyem ka ti pítin piti épucaloolo, kamma nkapooke pálaŋi tooŋaa ya eeŋaŋii ya kafakan.

XI Ekina ewune Pútuun pa éfípihinii kapi-caakoollee fanfan̄ nkáyinan oom kincaam.

XII Ancuk poko púloon̄ cew kasiŋanee ti pisiya kamma nkataak pásuuma ti heenaput apan káyinanut tooŋaa ya.

Hicoku piliit

XIII Pakanam ti káyinan, payenka Ateeteyo náalafiye ka, unii tan óo tan unka ti hisoku Pútuun pa apalaka kamma aluu. Nuutowo ti hisoku apalaka kamma Pútuun pa mpimamale aluu nipiyeno ti kéecooke ka kafakanee.* Kafakan enkuu kúfuliyooŋful kípinapii ti Kunuu ka keenape ka kéehine ka aluu nipikuul nkúfulii lombo pínapii ti káyinan ka kiti aluu ti tooŋaa ya.

XIV Piyonkalaa-yonkal aluu nipifakanee ta núutuunane ta aluu ekoon̄an ya éesume ya. Fiyuu inniyina hitaaku ti hamake ha hiti Ateeteyo ati unaa Yéesu Krista.

* **II:XIII 2:13** Niŋ ekina tom: “kamma Pútuun pa mpimamale aluu nipifakanee kápiliŋ ti púcook pa.”

XV Ooto pakanam ti káyinan, nisiinjo coc in-nicok piliit ti kakalañan enka nuukalañane ka aluu, man ti kilim nin fotom ti leetal.

XVI-XVII Alímaati Ateeteyo ati unaa Yéesu Krista nin Pútuun pa Paapaa ati unaa piyankanan saan aluu sipicok piliit, mpuwufan aluu sempe ti páhin óo páhin peenape nin hilim óo hilim eeha innisoke. Pikina péelafiye pa unaa; ti kaasampan etempo mpuwufan unaa páhaañi piti cancowiyaaw nin cíki eenape.

III

Kéeyinane ka, kaluum ka kiteyii kiti Póol nin páhin pa piteyoo

I Fiye pakanam ti káyinan, ehe hilimam hikelan: niluum kiti unii, ancuk ekoonjan ya eti Ateeteyo kati ehancaloolo mpacas néemakiyanee pan óo pan pa neekaaye samat nii fa néekeyii fa ti aluu.

II Niluum lombo kati ufakanee ti keenaput ka nin keekance ka, kaatuko an óo an aneetaat éeyinane.

III Pale Ateeteyo áfulantoo ti hilimoo, afaawu-fan aluu sempe naafaas aluu ti Seetaani ya.

IV Nuutaak cíki ti Ateeteyo nii, aluu unka ti ihinu eeha nuusoke ha aluu te efinitowo ho ti ihinu.

V Alímaati Ateeteyo átintinjan saan aluu ti pálañi pa piti Pútuun pa nin ti kamukut ka kiti Eenucee ya.

Kákupanan keetaakut ka haaci

VI Aluu pakanam ti káyinan, ti caacaw ca citi Ateeteyo Yéesu Krista, usokaa aluu nílaañ an óo an éeyinane apan ataakut haaci, naapook elonj eti kakalañan enka nuukalañane ka aluu.

VII Nímeymeyi nii niñañaañañ káyipenan pawenal unii. Kaatuko unii uyenit pakan keetaakut haaci ta nuuyeniye ta niñ aluu.

VIII Utaapala uli paliyal an haahaw. Pale núuhinhin páhin penfakat hánant hanakan ancuk timpi uyokan an ti aluu.

IX Uhínaahin eehe neetaat nii uñañutee kayankanan, pale kati úyisan aluu elonj eyya éfiniyipenan.

X Ta nuuyeniye ta niñ aluu, uwufanaawufan aluu hilim ha heesiñanee eehe: “An óo an éelafiit páhin, añañut hili.”

XI Usíyaasi nii pakakee ti aluu kataakut haaci, keekuuñe apan nkáyemi ti kanakan ñutumii ti hiti pakakee pakan.

XII Pakan paka payenkuu nuuñiino ti caacaw ca citi Ateeteyo Yéesu Krista nii, káhin páhin ti kapepan kati kataak paliyal.

XIII Inkéyyoo ti aluu pakanam ti káyinan, timpi níwusen ti íhinu heenape.

XIV Nitah kunuu ti an óo an éetuulut eeha nuusoke ha ti leetal eyye. Timpi ninakanoolo neyii ancuk kati kasuu.

XV Háati fo timpi nicokii nii pikamool aluu, pale níkupananii samat nii pakan aluu ti káyinan.

Kakican kikelan

XVI Fiye álimaati Ateeteyo faŋoo ati kásuumaay ka awufan aluu kásuumaay tan óo tan ti káasiinuma óo káasiinuma. Ateeteyo ayeno niŋ aluu púlooŋ.

XVII Inci Póol kiice kakican enke niŋ epeesam. Leetal óo leetal fiye inci ínhin yo píyisan nii inci kiice, fiyuu inci inkiic.

XVIII Alímaati Ateeteyo ati unaa Yéesu Krista asampan aluu púlooŋ.

Kuloonaay
Karon: Kuloonaay (Portions)

copyright © 2018-2025 Wycliffe Bible Translators, Inc.

Language: Karon

Contributor: SIL International (in Africa)

All rights reserved.

2025-07-11

PDF generated using Haiola and XeLaTeX on 10 Jul 2025 from source files
dated 11 Jul 2025

404e2c05-c6eb-5f56-8cae-50a5b595ef9a